

Aralin 3

ANG ESPIRITU SANTO AY TUMUTULONG SA IYONG MANALANGIN

Sa Araling Ito'y Pag-aaralan Mo

- ✠ Tinuturuan Ka Ng Espiritu Na Manalangin
- ✠ Tinutulungan Ka Ng Espiritu Na Sumamba Sa Dios
- ✠ Tinutulungan Ka Ng Espiritu Na Magtapat
- ✠ Ipinakikita Sa Iyo Ng Espiritu Ang Dapat Hingin
- ✠ Mananalangin Sa Pamamagitan Mo Ang Espiritu

TINUTURUAN KA NG ESPIRITU NA MANALANGIN

Ano ang panalangin sa iyong pang-araw-araw na buhay – isang tungkulin, o kawili-wiling pakikipag-usap sa Dios? Waring malapit ba ang Dios kung nananalangin ka? Tinutugon ba ang mga dalangin mo? Nais mo bang kumilos na kasama ang Dios sa pamamagitan ng panalangin at makakita ng kahanga-hangang ibubunga nito? May Kaibigan kang bihasa sa pagtuturo sa mga tao kung paano mananalangin – Siya'y ang Espiritu Santo.

Pinag-aralan mo kung paano ginagawang tunay ng Espiritu Santo ang Dios sa iyo. Habang ipinakikita Niya kung gaano ka kamahal ng Dios, lalo mo namang minamahal ang Dios at ibig mong makapiling Siya nang matagal sa pananalangin. Alam mong nagmamalasakit ang Dios sa iyo kaya't buong tiwala mong mahihingi sa Dios ang anumang kailangan mo.

Ang Espiritu'y nagbibigay sa iyo ng pananampalataya upang humingi at ng katiyakang dinirinig ka naman ng Dios. Ginagamit Niya ang Salita ng Dios upang turuan kang manalangin. Sinasabi sa iyo sa Biblia ang dapat idalangin, paano dadalangin, at ano ang dapat asahan sa pananalangin. Ang mga pangako ng Dios ay ginagawang tunay sa iyo ng Espiritu at tinutulungan kang angkinin ang mga ito.

Ang pananalangin ay pakikipag-usap sa Dios.



Maaaring sumasambit ka ng mga salita, o kaya nama'y matahimik na nakatuon sa Dios ang isip mo. Sa panalangin dapat kang makinig din sa Dios bukod sa iyong pagsasalita. At kung

kinakausap mo ang Dios, dapat mong gawin ang tatlong bagay:

1. Sumamba ka sa Dios
2. Ipagtapat ang iyong pagkukulang
3. Hingin ang iyong nais



Ang panalangin mo'y tulad sa gulong na tumutulong sa iyo upang sumulong ka sa pagiging Cristiano at sa paglilingkod mo sa Dios. Ang gulong ay hindi



makararating sa malayo kung may bahaging kulang. Ikaw'y ibig tulungan ng Espiritu Santo sa bawa't bahagi ng iyong pananalangin.

Gawin Mo Ito

1. Ano ang panalangin? _____

2. Sabihin ang tatlong sangkap ng panalangin.

TINUTULUNGAN KA NG ESPIRITU NA SUMAMBA SA DIOS

Ano ang bahagi ng pagsamba sa iyong pananalangin? Sa pagsamba'y ipinahahayag mo ang iyong pag-ibig sa Dios. Kung walang pag-ibig, walang tunay na pagsamba, wala maliban sa panlabas na kilos. Dinadala ka ng Espiritu sa harapan ng Dios at tinutulungan kang tumugon sa Kanyang pag-ibig. Kung minsan, ang titik ng isang imno'y nagsasaad ng nadarama mong pag-ibig, kaya't aawit ka sa Dios. Kung minsan naman, pinupuri mo Siya nang malakas o kaya'y sa pamamagitan ng tahimik na pagpapahalaga at pasasalamat sa Kanyang kabutihan.



Efeso 2:18. "Dahil kay Cristo, tayo'y kapwa makalalapit sa Ama sa pamamagitan ng Espiritu."

Filipos 3:3. "Tayo... Ang pagsamba natin sa Dios ay sa Espiritu at na kay Cristo Jesus ang ating kagalakan."

Juan 4:24. "Ang Dios ay Espiritu; at ang mga sa Kanya'y nagsisisamba ay kinakailangang magsisamba sa espiritu at sa katotohanan."

Sinulat ng dakilang tagapangaral na si Charles Finney:

"Nang pumasok ako sa silid at ipinid ang pinto, wari bang nakaharap ko nang mukhaan ang Panginoong Jesu-Cristo... wala Siyang sinabi, nguni't tiningnan ako, anupa't para akong binabalaning nanangis sa Kanyang paanan. Para akong batang maliit na nag-umiyak at pahikbihikbing nagtapat sa Kanya ng aking mga kasalanan... At pagbaling ko upang umupo sa malapit sa painitan, tinanggap ko ang makapangyarihang Bautismo ng Espiritu Santo... Kulang ang mga salita upang sabihin ang kahanga-hangang pag-ibig na pumuno sa aking puso. Nanangis ako sa malaking kagalakan at pag-ibig."

Ibig mo ba na ang pagsamba ay maging bahagi ng iyong pang-araw-araw na pamumuhay? Mangyayari ito kung makikipagtulungan ka sa Espiritu Santo sa limang paraan.

1 Bumasa ng isang Awit bawa't araw. Makatutulong sa iyo ang Mga Awit upang lalo mong pahalagahan ang Dios.



2 Pansinin mo ang mga panalangin sa Biblia. Ang mga ito'y magsisilbing halimbawa para sa iyo.

3 Sa pananalangin, sambahin mo muna ang Dios bago mo hingin ang iyong kailangan sa Kanya. Isipin kung ano ang nais Niya at hindi lamang ang nais mo.



Awit 100:4. "Magsipasok kayo sa Kanyang mga pintuang-bayan na may pagpapasalamat, at sa Kanyang looban na may pagpupuri: mangagpasalamat kayo sa Kanya, at purihin ninyo ang Kanyang pangalan."

4 Umawit ng mga awit ng pagsamba at pasasalamat. Umawit sa Dios sa tahanan o sa iglesya. Isipin ang mga titik at damahin ang kahulugan ng awit. Maaari kang bigyan ng Espiritu ng bagong awit ng pagsamba sa Dios.



Efeso 5:18-20 "Sikapin ninyong mapuspos ng Espiritu Santo. Ipahayag ang damdamin sa pamamagitan ng salmo, inno. Buong pusong umawit at magpuri.. Laging magpasalamat sa Dios at Ama sa pangalan ng ating Panginoong Jesu-Cristo."

5 Patulong ka sa Espiritu Santo. Maraming nangapuspos ng Espiritu Santo ang nagsasalaysay na nakasumpong sila ng panibagong kagalakan at kalayaan sa pagsamba. Ikaw rin ay nais tulungan ng Espiritu Santo sa ganyang paraan.



Gawin Mo Ito

3. Ano ang pagsamba? _____

4. Pasalamatan ang Dios sa pagsusugo ng Espiritu Santo upang tulungan kang sumamba sa Kanya. Patulong sa Espiritu Santo upang masamba mo ang Dios. Pagkatapos, sa loob ng limang sandali, pasalamatan at purihin at sambahin ang Dios nang walang hinihinging anuman sa Kanya.
5. Basahing malakas patungkol sa Dios ang Awit 145. Pagkatapos, pumili ng awit ng pagsamba at awitin ito para sa Dios.
6. Itala ang mga bagay na ipagpapasalamat mo sa Dios.

TINUTULUNGAN KA NG ESPIRITU NA MAGTAPAT

Nadama mo na bang parang ayaw lumampas sa dingding ang panalangin mo at hindi makaabot sa Dios? Ang Espiritu Santo ay nagnanais tumulong sa iyo upang maalis ang anumang hadlang sa iyong panalangin. Isipin mo kung paano ang kilos ng isang batang sumusuway sa kanyang ama. Natutuwa ba siyang makita ang kanyang ama? Sumasalubong ba siya o umiiwas?



Kahit na kailangan niya ang tulong ng kanyang ama, pinipigil siya ng kanyang kasalanan. Kinakailangan niyang ipagtapat ang kanyang nagawa, humingi ng tawad, at huwag nang sumuway pa. Kapag ito'y ginawa niya, muli niyang ikasisiya ang pagmamahal

ng kanyang ama, at buong tiwalang makahihingi ng tulong mula sa kanyang ama.

Gayon din ang nangyayari sa pagitan natin at ng Dios.



Gayunman, madalas tayong bulag sa ating mga pagkukulang. Kaya't tinutulungan tayo ng Espiritu Santo upang makita natin kung saan tayo nagkulang, at kung gaano kasama ang kasalanan.

Tinutulungan tayong ipagtapat ito sa Dios. Kung nagkasala tayo sa ating kapwa, pinahihingi tayo ng tawad at tinutulungan tayong magsikap upang maituwid ang lahat. Ang ganito'y naging bahagi ng mga pagpapanibagong-sigla mula pa nang panahon ng Banal na Kasulatan.

Maraming halimbawang ibinibigay si Jonathan Goforth sa kanyang *"When the Spirit's Fire Swept Korea"*. Maraming buwan nang nananalangin ang mga misyonerong Presbyterian at Methodist upang magkaroon ng pagpapanibagong-sigla. Naganap nga ito at nagpatuloy sa loob ng maraming taon at nagbunga ng matitibay at espirituwal na iglesya. Nagsimula ito sa isang gawaing-misyon sa Ping Yang.

"Samantalang ginaganap ang pulong sa karaniwang kaayusan, marami ang nagpasimulang umiyak at magpahayag ng kanilang kasalanan. Sinabi ni G. Swallen na noon lamang siya nakadalo sa gayong nakapagtataakang gawain. Nagpaawit siya ng isang imno, upang masugpo ang madamdaming simoy na kumakalat sa kapulungan. Subali't makailang-ulit siyang nabigo. Saka niya napagkilalang may Ibang Namamahala sa gawaing iyon."

Pagkaraan nito, inasam ng inang iglesya sa Ping Yang na magtatamasa sila ng isang tanging pagpapala sa kanilang Linggo ng Panalangin, subali't waring di-tinugon ang kanilang panalangin. Nang huling gabi, nagitla ang may 1,500 katao nang tumindig ang pangunahing kaanib ng iglesya, si G. Keel, at sinabing hindi magbubuhos ng pagpapala ang Dios dahil sa kasalanan niya. Bago raw namatay ang isang kaibigan,

sinabihan siyang pamahalaan ang naiwanan nitong ari-arian. Subali't inangkin niya ang malaking halaga mula rito. Matapos magtapat, aniya: "Ibabalik ko bukas ng umaga ang salaping iyon sa kanyang balo."

"Pagdaka'y nadama ng lahat na nawala na ang hadlang at dumating ang Dios, ang Kabanal-banalan. Naantig ang lahat; nadama nila ang kani-kanilang taglay na kasalanan. Ikapito ng gabi nang simulan ang gawain, subali't ikadalawa ng madaling-araw na'y marami pa ang nag-iyyakan, at naghihintay ng pagkakataon upang magtapat.

Nagbunga ang maraming buwan ng pananalangin, sapagka't nang dumating ang Espiritu Santo, ginawa Niya sa loob ng kalahating araw ang magagawa sa kalahating taon ng lahat ng mga misyonero roon. Wala pang dalawang buwan ang nakaraan, mahigit nang dalawang libo ang nahikayat sa Panginoon.

Nang kalagitnaan ng 1907, may 30, 000 ang naitalang nahikayat at nakaanib sa iglesya sa Ping Yang. Malinaw na makikitang ang pagpapanibagong-sigla'y hindi napawi kahit nang taong 1910, sapagka't nang buwan ng Oktubre ng taong iyon, 4,000 ang nabautismuhan sa loob ng isang linggo lamang.

Ang naganap sa Ping Yang ay ulit-ulit na nangyari sa buong mundo, sa maraming iba't ibang iglesya. Kapag hinayaan ng mga Cristiano na siyasatin ng Espiritu ang kanilang kaluluwa, mabubunyag ang mga hadlang sa pagpapanibagong-sigla.



Kapag ipinagtapat ng mga Cristiano ang kanilang kasalanan at nakipag-ayos sa Dios at sa kapwa tao, magagamit sila ng Dios sa ikadadakila ng Kanyang pangalan. Dumarating ang pagpapanibagong-sigla. Natutugon ang mga panalangin. Naliligtas ang mga kaluluwa.



2 Cronica 7:24. "Kung ang Aking bayan na tinatawag sa pamamagitan ng Aking pangalan ay magpakumbaba at dumalangin, at hanapin ang Aking mukha, at talikuran ang kanilang masamang mga lakad; Akin ngang diringgin sa langit, at ipatatawad Ko ang kanilang kasalanan, at pagagalangin Ko ang kanilang lupain."



1 Juan 1:8, 9. "Kung sinasabi nating tayo'y walang kasalanan, ay ating dinadaya ang ating sarili, at ang katotohanan ay wala sa atin. Kung ipinahahayag natin ang ating mga kasalanan, ay tapat at banal Siya na tayo'y patatawarin sa ating mga kasalanan, at tayo'y lilinisin sa lahat ng kalikuan."



Awit 139:23, 24. "Siyasatin Mo ako, Oh Dios, at alamin Mo ang aking puso; subukin Mo ako, at alamin Mo ang aking mga pag-iisip: at tingnan Mo kung may anumang lakad ng kasamaan sa akin, at patnubayan Mo ako sa daang walang hanggan."



Awit 19:12, 14. "Sinong makakikita sa kanyang mga kamalian? Patawarin mo ako sa lihim kong kamalian. Maging kalugod-lugod nawa ang mga salita ng aking bibig, at ang pagbubulay ng aking puso sa Iyong paningin, Oh Panginoon, na aking Malaking Bato, at aking Manunubos."

Gawin Mo Ito

7. Isaulo ang 2 Cronica 7:14.
8. Kung may Biblia ka, basahin ang Awit 51 sa diwa ng pananalangin.
9. Isaulo ang Awit 139:23, 24 at Awit 19:12, 14. Sambitin ito sa Dios at hintayin ang Kanyang pagtugon sa iyo. Hingin sa Espiritu Santo na ipakita sa iyo ang mga pagkukulang mo. Pagkatapos, ihingi ito ng tawad at tulong upang maituwid mo. Gawin ang iaatas Niyang gawin mo. Magpasalamat sa Dios dahil sa dugo ni Jesus na lumilinis sa kasalanang iyong ipinagtapat.

IPINAKIKITA SA IYO NG ESPIRITU ANG DAPAT HINGIN

Inuudyukan ka ng Espiritu Santo na hingin sa Ama ang kailangan mo. Ipinagugunita Niyang idalangan mo ang pangangailangan ng iba. At pinalalakas ang pananampalataya mo upang panaligan mong ibibigay ng Dios ang anumang iyong hingin.



Roma 8:15. "Sapagka't hindi ninyo muling tinanggap ang espiritu ng pagkaalipin sa ikatatakot; datapuwa't tinanggap ninyo ang espiritu ng pagkukupkop, na dahil dito'y sumisigaw tayo, "Abba, Ama!"



Filipos 4:6. "Huwag kayong mangabalisa sa anumang bagay; kundi sa lahat ng mga bagay, sa pamamagitan ng panalangin at daing na may pagpapasalamat ay ipakilala ninyo ang inyong mga kahilingan sa Dios."

Subali't kung minsan hindi natin alam kung ano ang ating kailangan. Maaaring ang mahingi mo'y maling bagay. Kaya't naririyang ang iyong matulunging Kaibigan, ang Espiritu Santo, upang ipaisip ang dapat mong hingin sa pananalangin para sa iyong sarili at para sa iba.

Minarapat ng Dios na kumilos sa pamamagitan ng iyong panalangin. Kailanma't may pangangailangan, sinasabi Niya sa Kanyang mga anak na sila'y manalangin. Pagkatapos, ginagawa Niya ang

nararapat bilang tugon sa kanilang dalangin. Ganito Siya kung magligtas ng mga kaluluwa, magpairal ng pagpapanibagong-sigla, sa Kanyang pagpapagaling sa maysakit, paglutas ng mga suliranin, at pagkakaloob ng ating kailangan. Ibinibigay ng Dios ang pananagutan sa iyo upang idalangin ang iyong mag-anak, mga kaibigan, ang iyong iglesya, bansa at ang sanlibutan. May bisa ang panalangin mo sa gawain ng Dios sa buong sanlibutan.



Maaaring antigin ka ng Espiritu Santo na idalangin ang isang tao, kahit di mo alam kung ano ang kailangan niya. Baka naghihingalo ang taong iyon, o nasa panganib, o nasa mahigpit na pagtukso, o kaya'y nangangailangan ng di-pangkaraniwang lakas upang maganap ang gawain ng Dios. Tutulungan siya ng iyong mga dalangin.

Ang wika ng isang Cristianong taga-Portland, Oregon, sa kanyang pastor, si Joseph Bogue: "Kahanga-hanga ang naranasan ko ngayon. Sinabi ng Dios na idalangin ko ang isang Alva Walker sa Aprika. Nanalangin ako hanggang sa madama kong tumugon na ang Dios."



Doon pala sa Aprika'y nakabingit sa kamatayan si Alva Walker dahil sa matinding lagnat. Habang nananalangin ang di-kilalang kaibigan sa kabilang ibayo ng kanyang kinaroroonan, si Alva ay

nakatulog at pagkagising ay pagaling na. Naligtas ang buhay niya sapagka't may isang sumunod sa Espiritu.



Efeso 6:18. "Magsipanalangin kayo sa Espiritu ng lahat ng panalangin at daing sa buong panahon, at mangagpuyat sa buong katiyagaan at daing na patungkol sa lahat ng mga banal."

Gawin Mo Ito

10. Isaulo ang Filipos 4:6; Efeso 6:18.

MANANALANGIN SA PAMAMAGITAN MO ANG ESPIRITU

Mananalangin sa pamamagitan mo ang Espiritu Santo, sa sarili mong wika, at may alab na higit kaysa likas mong pananalangin. Maaaring ito'y dahil sa nadama mong pangangailangan. O ito'y pangangailangan ipinadama ng Espiritu sa iyo habang pinapatnubayan Niya ang iyong isip at damdamin. Masidhing dumadaloy mula sa kaibuturan ng iyong puso ang pananalangin. At sumasamo naman sa Dios ang Espiritu para tugunin ang pangangailangang idinadalangin mo.

Sa iyong pananalangin, maaaring madama mo ang bigat ng isang pasanin, na parang sarili mong suliranin. Mananalangin sa pamamagitan mo ang Espiritu lakip ang pagtangis dahil sa nadadamang pangangailangan, bagama't hindi mo lubos na maunawaan.



Hebreo 5:7. "Si Cristo ay naghando ng mga panalangin at mga daing na sumisigaw ng malakas at lumuluha doon sa may kapangyarihang makapagligtas."



Roma 8:26, 27. "At gayon din naman ang Espiritu ay tumutulong sa kahinaan: sapagka't hindi tayo marunong manalangin ng nararapat; ... Siya ang namamagitan dahil sa mga banal, alinsunod sa kalooban ng Dios."

Kung minsan, nanaisin ng Espiritu na manalangin sa pamamagitan mo, sa wikang hindi mo alam nguni't alam Niya at ng Ama. Ang tawag dito ni Pablo ay pananalangin sa ibang wika, o "glossolalia". Sa ibang salin ito'y "pagsasalitang may kakaibang himig" sapagka't ang anumang wikang hindi natin nauunawaan ay kakaibang himig para sa atin.

Nananalangin sa pamamagitan mo ang Espiritu Santo para sa mga suliraning hindi mo na kailangang lubusang mabatid. Siya ang makadaraig sa lakas ni Satanas na humahadlang sa iyong pananalangin. Inaangkin ng Espiritu Santo ang tagumpay para sa iyo at tinutulungan kang magpuri sa Dios na tumutugon sa dalangin mo. Sa wikang makalangit ay



ipinahahayag Niya ang pag-ibig na di mo maipahayag, ang pangangailangang nagpapabigat sa loob mo, o ang pagpupuring nag-uumapaw sa puso mo.

Itinuro ni Pablo sa iglesya sa Corinto na kanilang hayaang manalangin sa pamamagitan nila ang Espiritu, sa wikang di-nila nauunawaan. Subali't hindi ito dapat pumawi sa kanilang pananagutang manalanging may pagkaunawa. Mahalaga kapwa ang dalawang uri ng pananalanging ito.



1 Corinto 14:2, 14, 15. "Ang nagsasalita ng wika ay hindi sa mga tao nagsasalita, kundi sa Dios, sapagka't walang nakauunawa sa kanya; kundi sa espiritu ay nagsasalita ng mga hiwaga. Sapagka't kung ako'y nananalangin sa wika, ay nananalangin ang aking espiritu, datapuwa't ang aking pag-iisip ay hindi namumunga. Ano nga ito? Mananalangin ako sa espiritu, at mananalangin din naman ako sa pag-iisip."

Inaalok ka ng Dios ng kawili-wiling pakikipag-sapalarang kasama Niya. Paunlakan mo ang Espiritu Santo na ikaw'y akayin, turuang manalangin, at manalangin sa pamamagitan mo. Makikita mo ang maraming kahanga-hangang tugon sa mga panalangin kapag iyong tinanggap ang ministryong ito.



Gawin Mo Ito

11. Isaulo ang Roma 8:26, 27. Nais mo ba na ang Espiritu Santo ay manalangin sa pamamagitan mo? Kausapin mo Siya tungkol dito.
12. Nais mo ba ng ministeryo ng pananalangin? Magsimula na ngayon. Hingin sa Espiritu Santo na ipadama sa iyo ang Kanyang pamamatnubay. Gamitin ang mga pagkakataon upang manalangin sa iglesya at sa tahanan. Kung maaari, makiisa sa mga kaibigan para sa isang oras na pananalangin - mga kaibigang marunong manalangin ayon sa udyok ng Espiritu.
13. Masasambit mo ba ang 2 Cronica 7:14; Awit 139:23, 24; Awit 19:12, 14; Filipos 4:6, Efeso 6:18; Roma 8:26, 27?

LUMAKAD AYON SA ESPIRITU

May 32,000 pangako sa Salita ng Dios, at bawa't isa'y nasasalig sa pagganap ng tao sa hamon ng Dios upang tanggapin at maingatan ang banal na pagpapala ng Dios.

Sumulat si Pablo sa mga taga-Galacia ng ganito: "Kung napuspos kayo ng Espiritu, lumakad kayo ayon sa Espiritu." Ang mga mananampalataya sa Corinto ay nangapuspos ng Espiritu subali't hindi nila nakita ang pananagutang lumakad ayon sa Espiritu. Kaya't malungkot na ipinahayag ng apostol, "Kayo'y nasa laman... at lumalakad ayon sa panuntunan ng tao."

Gaano man karaming kaloob na espirituwal ang tanggapin ng isang tao mula sa Dios, wala siyang magaganap malibang lumakad siya ayon sa Espiritu. Halimbawa, naparito ang Espiritu Santo upang patnubayan ang mananampalataya sa buong katotohanan, subali't paano Niya magaganap ang gawaing ito sa buhay ng mananampalataya kung hindi mag-aaral ng Salita ng Katotohanan?

Ang Espiritu Santo ay naparito (Gawa 1:8) upang bigyan tayo ng kapangyarihan at kakayahang maging saksi, subali't paano Niya bibigyan ng kapangyarihan ang isang ayaw magpatotoo? Muli, iniaalok ng Espiritu Santo ang Kanyang dakilang ministryo ng pagtulong sa mananampalataya sa pananalangin, subali't paano Niya isasagawa ito kung ang naturang mananampalataya ay hindi nananalangin at nagpapabaya sa kanyang buhay mapanalanginin, o kaya'y hindi pumapansin sa Espiritu Santo kahit siya nananalangin?

Lahat ng handog ng Dios bilang tugon sa pagtatalaga o pagpapabanal ng tao ay biglaang ipinagkakaloob... Subali't ang bunga ng Espiritu ay lumilitaw lamang habang lumalakad ang tao ayon sa Espiritu, at araw-araw na ipinaiilalim ang kanyang katawan sa pag-aakay ng Espiritu at kanyang ginagamit ang banal na mga kaloob ng Dios. "Lumakad ayon sa Espiritu."

-Mula sa The Baptism in the Holy Spirit
Ni Willard Cantelon, Ebanghelista ng
Assemblies of God. © 1951 ni Willard Cantelon
Gospel Publishing House, Springfield, Missouri 65802